

**Hepatitis B-mut akiuussutissamik nunatsinni meeqqat akiuussutissanut allanut kapitittarnerannut ilanngullugu kapitittalernissaannik Naalakkersuisut suliniuteqaqqullugit peqquneqarnissaannik aalajangiiffigisassatut siunnersuut**  
(Inatsisartunut ilaasortaq Olga P. Berthelsen, Inuit Ataqtigiit)

**pillugu**

**Inatsisartut Peqqissutsimut Ataatsimiititaliaata**

**ISUMALIUTISSIISSUTAAT**

**Siunnersuutip aappassaaneerneqarnerani saqqummiunneqartoq**

Inatsisartut Peqqissutsimut Ataatsimiititaliaat suliarinninnermini ukuningga inuttaqarpoq:

Inatsisartunut ilaasortaq Olga P. Berthelsen, siulittaasoq, Inuit Ataqtigiit  
Inatsisartunut ilaasortaq Debora Kleist, siulittaasup tullia, Inuit Ataqtigiit  
Inatsisartunut ilaasortaq Jakob Skade, Kattusseqatigiit Partiiat  
Inatsisartunut ilaasortaq Malik Berthelsen, Siumut  
Inatsisartunut ilaasortaq Kristian Jeremiassen, Siumut, sinniisussaq

Ulloq 22. oktober 2009 siullermeerneqarnerata kingorna Inatsisartut Peqqissutsimut Ataatsimiititaliaata siunnersuut sukumiisumik misissorpaa imatullu oqaaseqaateqarluni:

**Siunnersuutip imarisaa siunertaalu**

Kalaallit Nunaanni nappaammik hepatitis B-mik amerlasuut tunillatsissimasut malugineqarsimasoq siunnersuuteqartup oqaatigaa. Nappaat akiuussutissamik nakorsaatissaqartinneqaraluarluni katsorsarneqarsinnaangilaq.

Hepatitis B-mik nappaatillit hepatitis D-mik tunillatsinnissamut annertuumik ulorianartorsiortarput. Nappaat hepatitis D ulorianartuuvoq, taassumalu tinguk 80 % tikillugu millisissinnaavaa. Nappaat meeqqanik akiuussutissamik kapuunikkut akiorneqarsinnaasoq siunnersuuteqartoq isumaqarpoq.

**Inatsisartuni siullermeerneqarnera**

Siullermeerneqarnerani siunnersuut partiinit Naalakkersuisunillu ataatsimut isigalugu tigulluarneqarpoq.

Hepatitis B-mut akiuussutissalersuinissap saniatigut meeqqanik akiuussutissalersuisarnermut peqatigitillugu pneumokokkerinut akiuussutissalersuisalernissap aallartinneqarnissaa Naalakkersuisut kaammattuutigivaat, taakku siutikkut maqisoornermut, bihulemi aseruuttoornermut, torluup aqquataani nuannermut aamma puakkut nuffersoornermut pissutaasarput, kiisalu aseruuttoornerit perulunnartut, soorlu aakkut toqunartoqalernerit aamma qaratsap ameraasaanik aseruuttoornerit (meningitis) kingunerisinnaasarlugit.

Siunnersuut akuerineqassappat hepatitis B-mut aamma pneumokokkerinut akiuussutissalersuisarnerup aallartinnissaanut 2010-mut aningaasanut inatsisissatut siunnersuummut katillugit 3,6 mio. kr.-t nalinginut allanguutissatut siunnersuummik saqqummiussaqaarnissaq Naalakkersuisunit isiginiarneqassaaq, tamatumunngalu ilaatineqassapput pilersaarut naapertorlugu meeqqat ilaannut akiuussutissalersuisarnermi ukiunik qaangeersimasunut pilersaarummut ilanngussinissaq. 2010-mi taakkua 3,6 mio. kr.-t saniatigut ukiuni missingersuusiorfiusuni 1,6 mio. kr.-t aningaasaliissutiginiarneqarput.

**Peqqissutsimut ataatsimiititaliamit oqaaseqaatit**

Pitsaaliuinermit suliniutinut ingerlasunut aalajangiffigisassatut siunnersuut tulluurtuusoq Peqqissutsimut ataatsimiititaliaq isumaqarpoq. Taamatuttaaq Peqqissutsimut ataatsimiititaliaq isumaqarpoq suliniut taanna peqqinnissaqarfimmut piffissaq ungasinnerusoq eqqarsaatigalugu aningaasarsiornikkut maanna atugarliutaasunut naluneqanngitsutut ukiuni kingullerni amerliartuinnarsimasunut ikilileeqataasinnaassasoq.

Aammattaaq qinigaaffimmi matumani iliuusissatut pilersaarut pillugu nassuiaammik malitseqartitsisoqassasoq Peqqissutsimut ataatsimiititaliap inassuteqassalluni pissutissaqartut isigaa. Allatut oqaatigalugu nappaatit siuliani taasat ikililernerinut akiuussusersuinermit siunertaq pillugu malitseqartitsisoqassaaq, taamaalilluni kingunerisai suliniutillu kingusinnerusukkat atugassatut uppernarsarneqarsinnaassammata, suliamullu attuumassuteqartutigit naalakkersuinikkullu pisariaqartillugu atorneqarlutik.

**Tamanna tunngavigalugu aalajangiiffigisassatut siunnersuut akuerisassanngorlugu Peqqissutsimut Ataatsimiititaliamit innersuussutigineqarpoq.**

Taama oqaaseqarluni Inatsisartut Peqqissutsimut Ataatsimiititaliaata siunnersuut Inatsisartuni aappassaaniigassanngortippaa.

Olga P. Berthelsen,  
Siulittaasoq

Debora Kleist

Jakob Skade

Malik Berthelsen

Kristian Jeremiassen.  
sinniisussaq